



Selasa, 08 Pebruari 2022

Ogen: Esekjel 28: 20-23



Ersegat ate nandangi si jahat



Sue ras gelar tahun pelayanen gerejanta 2022 enda e me kreatif merawat lingkungan. Ibabai kita guna ngidah maka kerinana si ijadiken Dibata tuhu-tuhu mehuli dengen ersura Ia gelah kerinana i bas doni enda tetap mehuli. Sabap ijadikenNa manusia e me guna jadi "tan" Dibata erdahin mpekena-kena doni enda ras kerina isina. Alu kata si deban, Dibata erngena ate kempak si mehuli dengen ratur. La Ia erngena ate kempak perbahanen-perbahanen si jahat terlebih si mabai kecedan nandangi doni enda.

Bage me pe asum Israel igombang-gombangi bangsa si la nandai Dibata Israel. Nterem bangsa-bangsa si nggombang-nggombangisa. Nabi Esekiel selaku nabi mbelin (nabi besar) ikut naksiken kerinana uga bangsa Israel iolok-olok dengen lanai lit erga dirina ibahan bangsa sekelewetna. I je merawa Tuhan nandangi bangsa si meganjang ukur hususna e me Sidon. "Aku me musuhndu o Sidon" nina Tuhan. Adina Dibata enggo melasken kata enda, tentu isurakenNa me kehancuren nandangi Sidon. Janah e isehkenNa me. Iukum Tuhan me ia sebab rusur ibahanna si la mehuli. I je me itandaina aku Dibata si erseगत ate nandangi si jahat bagenda nina Tuhan kempak BangsaNa Israel.

Hakekat kegeluhenta manusia tinepa Dibata tentu labo sidauhen ras biak Dibata si njadiken kita. Mediate, mehuli, meteh aturen dengen ermeriah ukur i bas si benar. Nterem min kita tetap ndalanken bagi si ngena ate Dibata. I bas kegeluhenta enda pedauh min biak-biak kiniganjangen ukur. Segelahna kita pe ikut naksiken kiniulin Dibata i bas kegeluhenta. Selaku Moria pe la ngena ateta si la uli jadi i bas jabu. Tugasta pe mabai jabunta tetap bagi si ngena ate Dibata.